

# ТАРИХИ ЖӘДІГЕРЛЕРДІ ДӘРІПТЕУ – ЖАҢҒЫРУҒА ҚОСҚАН ҮЛЕС

**Рухани жаңғыру – адам баласының оның ішкі әлемінің жаңаруы, сана-сезімі, жаңа өзгерісті қабылдай білуі. Рухани жаңғыруды өркениеттің өрге жүзуімен байланыстырамыз.**

Тарих сахнасына көз жүгіртсек, өскен ұлттың өрби түсуіне осы рухани жаңғыру дәлел. Көне замандағы көрікті қалаларымыз, сән салтанаты келіскен озық ескерткіштеміз, мәдени мұраларымыз ерекше айғақ болып табылады. Рухани жаңғырудың негізі – халықтың, жеке адамның тұлғаға айналуы. Әр заманның өз міндеті, ұрпаққа қояр талабы бар болатынындай, мемлекеттің дамуы – ұрпақтың уақыт талабына сай бейімделіп, мәдени ортаға қалыптасуға деген ұмтылысына байланысты.

Рухани жаңғырудың бірнеше бағыттарын атап өтсек:

**Ұлттық бірегейлікті сақтау.** Ұлттық жаңғыру – ұлттық сананың кемелденуі. Бірінші, Елбасы айтқандай «жаңа мәдениет сақталмаса, ешқандай жаңғыру болмайды. Екіншісі – ұлттық болмыста тұрпатты жаңғырудың ең басты шарты ұлттық кодты сақтай білу.» Ұлттық ың өзегін сақтау, өткеннің кертартпа тұстарынан бас тарту.

**Бәсекелік қабілет.** Ұлттың аймақтық немесе жаһандық нарықтағы бағасы, өзгелерден сапасымен ұтымды дүние ұсынуға қабілеті. Заман талабына сай тұтас халық қана емес, жеке адамның өзі бәсекелік қабілетін арттырып, табысқа жетуге мүмкіндік алады.

**Прагматизм.** Өзінің ұлттық және жеке байлығыңды нақты білу, сол байлықты үнемдей отыра қолдана білу. Болашақты жоспарлай отыра, ысырапшылық пен даңғойлық қасиеттерге жол бермеу. Білім алуға, мақсатқа жетуге, кәсіби тұрғыдан жетілуге деген ынта ықылас, осы жолда әр нәрсені ұтымды пайдалану мінездің прагматизмі. Заманауи әлемдегі бірден-бір үлгі.

**Білімнің салтанат құруы.** Біздің қанымызда бар қасиет – білімді болуға ұмтылу. Табысты болудың басты факторы – білім. Жыл өткен сайын, біз жүрісі жылдам дамыған дәуірге аяқ басып келеміз. Сондықтан, құндылықтар жүйесінде білімді бәрінен биік қоятын ұлт биік табыстарға жетеді.

Қазақстанда осы рухани жаңғыруға байланысты көптеген іс-шаралар өткізіліп жатады. Жастарды рухани жаңғыруға шақыру мақсатында, тіпті қарияларды да қатыстырып өткізетін іс-шаралар бар. Оның бірден-бір себебі, рухани мәдениетімізді толықтай біліп, қарияларымыздан салт-дәстүрлерімізді үйреніп, оны әрмен қарай жалғастыру жастардың міндеті екендігін санамызға сіңіруге ықпал етеді. Біз өз еліміздің рухани мәдениетімізді, салт-дәстүрлерімізді білу үшін міндетті түрде тарихқа ерекше көңіл бөлуіміз және оны жүрекпен қабылдай білуіміз керек.

Десек те келешекте ескеретін мәселелер жоқ емес. Мұрағат құжаттары негізінде киелі жерлердің картасы жасалып, «Рухани жаңғыру» және «Рухани қазына» бағдарламаларына енгізілгенімен, кей тарихи нысандар қамқорлыққа зәру. Солардың бірі – республикалық маңызға ие, ежелгі энеолит дәуірінің ғажайып ескерткіші саналатын, ежелгі адамдар мекені болған, жылқы қолға үйретіліп, кымыз ашытылған Ботай қонысы. Біздің дәуірімізге дейінгі бесінші ғасырда негізі қаланған Бай қара ескерткіші де назардан тыс қалған тәрізді. Қасиетті нысандардың дені жырақ жерлерде орналасқандықтан, адамдар бара бермейді. Бірқатары тозғандықтан, заманауи талаптарға сай жаңғыртуды қажет етеді. Қазақстандағы тарихи кесенелер мен қоныстарды естен шығармай жастарға дәріптеу рухани жаңғыруға үлкен үлесін қосады деп үміттенемін.

Менің ойымша, бір ел тату-тәтті өмір сүріп рухани жаңғыруға әрбір азамат өз үлесін қосқан кезде бірегей болып дами түсетініміз анық. Кез-келген ұлт, кез-келген адам өзі өмір сүріп жатқан еліне деген шынайы махаббатпен, патриоттық сезіммен қарай білсе, «нұр үстіне нұр» деген осы шығар. Ел болашағы-жастардың қолында, демек әрбір қазақ баласы еліміздің көркеюіне, өркендеуіне өз үлесін қосуы тиіс.

**Г. СЕРІКБАЕВА**

**М Әуезов атындағы**

**ОҚУ-дың аға оқытушысы, магистр,**

**А.АБДРАМАНОВА,**

**ЕП-21-3к2 тобының студенті**